

**Siusinaartumik pensionisiaqarnermut maalaaruteqartarfik pillugu Namminersorlutik Oqartussat nalunaarutaat nr. 25, 28. oktober 2016-imeersaq**

Siusinaartumik pensionisiat pillugit Inatsisartut inatsisaanni nr. 40, 9. december 2015-imeersumi § 10, imm. 2 naapertorlugu aalajangersarneqarput:

**Kapitali 1**

*Maalaaruteqartarfiup ilaasortalersugaanera*

§ 1. Siusinaartumik pensionisiaqarnermut maalaaruteqartarfik tassaavoq kommunalbestyrelsip siusinaartumik pensionisiat pillugit Inatsisartut inatsisaat naapertorlugu, inuup sulisinnaassusiata procentianik aalajangiineranik allaffissornikkut naammagittaalliortarfik.

§ 2. Siusinaartumik pensionisiaqarnermut maalaaruteqartarfiup ilaasortarai siulittaasoq inatsisilerituutut ilinniarsimasoq ilaasortallu allat marluk.

*Imm.2.* Siulittaasoq, siulittaasulluunniit tamatumunnga piginnaatitaa maalaaruteqartarfik sinnerlugu kinnertartuuvoq.

§ 3. Siusinaartumik pensionisiaqarnermut maalaaruteqartarfiup siulittaasua (kinguliini taagorneqartoq Siulittaasoq) ilaasortallu allat, kiisalu taakkununnga sinniisussat Naalakkersuisunit toqqarneqartarput. Siulittaasup sinniisussaa ilaasortallu sinniisussaat Siulittaasutuulli aamma maalaaruteqartarfimmi ilaasortatuulli inuttut ilinniakkatigullu piukkunnaateqartuussapput.

*Imm.2.* Siulittaasoq ilaasortarlunniit ataatsimiinnissami peqataasinnaangippat Siulittaasup sinniisussaa ilaasortalluunniit sinniisussaa ataatsimiigiqquneqassaaq. Aamma taamaassaaq Siulittaasoq ilaasortarlunniit suliassamut suliarineqartussamut aalajangersimasumut attuumassuteqarpat.

**Kapitali 2**

*Ingerlatsineq pillugu inatsiseqarnermi maleruagassat il.il.*

§ 4. Siusinaartumik pensionisiaqarnermut maalaaruteqartarfik pisortat ingerlatsinerannut ilaavoq. Maalaaruteqartarfimmi ilaasortat taakkunungalu sinniisussat, taamatullu aamma maalaaruteqartarfiup allattoqarfia ingerlatsinerminni pisortat pillugit inatsiseqarnermi maleruagassani atuuttuni, matumani aamma pisortat ingerlatsineranni suliassat suliarineqartarnerat pillugu Inatsisartut inatsisaanni, suliassat attuumassuteqarneq nipangiussisussaataanerlu pillugit maleruagassani pineqartunut ilaapput.

*Imm.2.* Siusinaartumik pensionisiaqarnermut maalaaruteqartarfiup suliassat immikkut ilisimasalik paasisuttissat isertuussassat, maalaaruteqartarfiup pineqartumut ingerlateqqissimasai pillugit nipangiusimanneqqullugu allakkatigut peqqussavaa.

§ 5. Siusinaartumik pensionisiaqarnermut maalaaruteqartarfimmi ilaasortat taakkunungalu sinniisussat suliamik isumaginissaanut atortussat tigusimasamik inunnit susassaqaanngitsunit pissarsiarineqaannginnissaat paasineqaannginnissaalluunniit qulakkiigassaraat. Maalaaruteqartarfimmi ilaasortat taakkunungalu sinniisussat suliamik isumaginissaanut atortussat tigusimasatik ilaasortaajunnaarnerminni utertissavaat.

### **Kapitali 3**

#### *Suliassat piareersarneqarnerat aamma aalajangiiffigineqarnerat*

#### *Suliassat piareersarneqarnerat*

§ 6. Naalackersuisut Siusinaartumik pensionisiaqarnermut maalaaruteqartarfik, aningaasanut inatsisini ukiumoortuni aningaasaliissutit periarfissarititaat naapertorlugit allattoqarfeqartissavaat.

*Imm.2.* Naalackersuisut sulisunik, naammagittaalliuutit tiguneqartut ingerlaavartumik piareersarnissaannut, suliarineqarnissaannut aalajangiiffigineqarnissaannullu pisariaqartumik piukkunnaatilinnik atorfinitsitsissapput.

§ 7. Siusinaartumik pensionisiaqarnermut maalaaruteqartarfiup allattoqarfiata (kinguliini taaneqartoq Allattoqarfik) maalaaruteqartarfiup suliassai aqqissuutissavai.

*Imm.2.* Allattoqarfiup suliassat ataasiakkaat maalaaruteqartarfimmit suliarineqartussatut aalajangiiffigisassatullu qaqugukkut saqqummiunneqarnissaat aalajangissavaa.

§ 8. Allattoqarfik suliassat suliarineqarnissaannik piareersaanermik, suliassat paasissutissartaannik pissarsiniarnermik aamma maalaaruteqartarfimmi aalajangiinissamut suliaqarnissamullu siunnersuusiornermik isumaginnittuussaaq.

§ 9. Allattoqarfiup kommunalbestyrelsi siusinaartumik pensionisiat pillugit naammagittaalliortumut tunngatillugu suliassap paasissutissartaasa tamarmik assilineqarnerinik naammagittaalliummullu oqaaseqaammik qinnuigissavaa.

§ 10. Allattoqarfiup suliassaq Siusinaartumik pensionisiaqarnermut maalaaruteqartarfiup suliarisinnaasaanut ilaanersaq, naammagittaalliuutillu naammagittaalliornissamut piffissaliussap qaangiutinnginnerani maalaaruteqartarfimmut nassiunneqarsimanersut aalajangissavaa.

*Imm.2.* Allattoqarfiup aalajangiinerit imm. 1 naapertorlugu aalajangerneqartut maalaaruteqartarfiup ataatsimiinnissaani tulluuttumi siullermi ilisimatitsissutigissavai.

#### *Siulittaasup aalajangiinera, allakkatigut suliarinninneq aamma ataatsimiinneq il.il.*

§ 11. Siulittaasup suliassat Siusinaartumik pensionisiaqarnermut maalaaruteqartarfiup maannamut periaaserisai naapertorlugit nalorninartortaqaanngitsut aalajangiiffigisinnaavai.

*Imm.2.* Siulittaasup imm. 1 naapertorlugu piginnaatitaaffini Allattoqarfimmut tamakkiisumik ilaannakuusumilluunniit isumagitissinnaavai.

*Imm.3.* Siulittaasup aalajangiinerit imm. 1-imiit 2-mut naapertorlugit aalajangerneqartut maalaaruteqartarfiup ataatsimiinnissaani tulluuttumi siullermi ilisimatitsissutigissavai.

§ 12. Suliassat Siulittaasup naliliinera malillugu allakkatigut suliarineqarsinnaallutillu aalajangiiffigineqarsinnaasut aalajangiinissamut inassuteqarluni Siusinaartumik pensionisiaqarnermut maalaaruteqartarfiup ilaasortaanut nassiunneqarsinnaapput. Suliassap ataatsimiinnermi suliarineqarnissaa ilaasortamit ataatsimit qinnutigineqarpat tamanna pissaaq, tak. § 13.

§ 13. Siusinaartumik pensionisiaqarnermut maalaaruteqartarfiup suliassat ataatsimiinnerni suliaralugillu aalajangiiffigissavai. Siulittaasoq malaaruteqartarfiup ataatsimiinnerinik aqutsisuusaaq.

*Imm.2.* Ataatsimiinnerit videokkut qarasaasiakkut, oqarasuaatikkut assigisaatigulluunniit ingerlanneqartassapput. Immikkut ittunik aalajangersimalluinnartunillu pissuteqarluni imminut tikilluni ataatsimiinnissaq pisariaqarpat siulittaasup imminut tikilluni ataatsimiinnissaq aalajangersinnaavaa.

§ 14. Siusinaartumik pensionisiaqarnermut maalaaruteqartarfiup piffissat ataatsimiiffissai oqaluuserisassaalu Allattoqarfiup aalajangersartassavai. Naammagittaalliuutit tiguneqartut ataatsimiittarnerni ingerlaavartumik suliarineqarlutillu aalajangiiffigineqartassapput.

*Imm.2.* Ataatsimiigiaqqusinerit ullunik 14-inik piffissaqartitsilluni pisassapput. Ataatsimiigiaqqusinerit ilanngullugit nassiunneqassapput oqaluuserisassat, suliassat saqqummiunneqarnerat aamma naammagittaalliuutit ataasiakkaat maalaaruteqartarfimmit aalajangiiffigineqarnissaannut inassuteqaatit kiisalu suliassanut atortussat pisariallit.

*Imm.3.* Suliassaq aalajangersimasoq sivikinnerusumik piffissaliilluni ataatsimiigiaqqusinerissamut immikkut pissutissaqartitsippat Allattoqarfik, Siulittaasoq isumasioreerlugu taamaaliorsinnaavoq.

§ 15. Siusinaartumik pensionisiaqarnermut maalaaruteqartarfik aalajangiisinnaassuseqaassaaq maalaaruteqartarfimmi ilaasortat taakkunungaluunniit sinniisussat tamarmik ataatsimiinnermi peqataappata.

§ 16. Siusinaartumik pensionisiaqarnermut maalaaruteqartarfiup ataatsimiinneri tamanut ammasuunngillat.

*Imm.2.* Allattoqarfimmi sulisut maalaaruteqartarfiup ataatsimiinnerini Siulittaasup aalajangiineratigut peqataasinnaapput.

*Imm.3.* Allattoqarfiup suliamik immikkut ilisimasallit suliassap erseqqissaassutigineqarnerani ikuussinnaanerit, Siulittaasoq isumasioreerlugu aalajangersinnaavaa. Suliamik immikkut ilisimasallit maalaaruteqartarfiup suliassamik suliaqarnerani aalajangiineranilu peqataasinnaanngillat.

§ 17. Allattoqarfik Siusinaartumik pensionisiaqarnermut maalaaruteqartarfiup ataatsimiinnerisa imaqarniliornerannik suliaqassaaq. Imaqarniliatut siunnersuutip allaqqaarneqarnera maalaaruteqartarfiup ataatsimiinnerata kingorna kingusinnerpaamik sap.ak. 4-t qaangiunneranni nassiussorneqassaaq. Oqaaseqaatissat nassiussuinerup kingorna kingusinnerpaamik ullut 14-it qaangiunneranni Allattoqarfimmut nassiunneqassapput. Imaqarniliaq tamatuma kingorna naammassineqartutut isigineqassaaq.

#### *Aalajangiinerit*

§ 18. Siusinaartumik pensionisiaqarnermut maalaaruteqartarfiup aalajangiineri amerlanerussuteqarnikkut pissapput.

*Imm.2.* Maalaaruteqartarfiup aalajangiineri allaganngorlugit aammalu tunngavilersorlugit suliarineqassapput. Maalaaruteqartarfiup aalajangiineri Siulittaasup, maalaaruteqartarfik sinnerlugu atsiussavai. Aalajangiineq isumaqatigiinnigiffiusumik aalajangiineruppat ilaasortap immikkut isumaata allanneqarnissaa Siulittaasup aalajangersinnaavaa.

*Imm.3.* Maalaaruteqartarfiup aalajangiinera naammagittaalliuuteqartumut, kommunimut pineqartumut kiisalu Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalakkersuisoqarfimmu nassiunneqassaaq.

**§ 19.** Siusinaartumik pensionisiaqarnermut maalaaruteqartarfiup aalajangiineri, Siulittaasup aalajangiineratigut, kimut tunngasuuneri paasineqarsinnaajunnaarsarlugit tamanut saqqummi- unneqarsinnaapput, tamanut pingaaruteqarpata imaluunniit maalaaruteqartarfiup periaaserisaa pillugu ilitsersuutissatut naleqquppata. Tamanut saqqummiussineq nalisaalluni, maalaaruteqartarfiup aalajangiinerani suut pingaaruteqartinneqarneri tamanullu pingaaruteqarsorineqarneri imaluunniit maalaaruteqartarfiup periaaserisaa pillugu ilitsersuutissatut atorneqarsinnaasorineqarneri taallugit issuaanikkut pissaaq.

## **Kapitali 4**

### *Ilaasortaajunnaarsitsisarneq aamma nutaanik toqqaasarneq*

**§ 20.** Naalakkersuisut Siusinaartumik pensionisiaqarnermut maalaaruteqartarfimmi ilaasortanik ilaasortaajunnaarsitsisinnaallutillu ilaasortanik nutaanik, matumani aamma Siulittaasumik nutaamik toqqaasinnaapput. Nutaanik toqqaaneq utaqqiisaagallartumik aammalu maalaaruteqartarfiup suliffeqarnermut, isumaginninnermut, peqqissutsimut, ilinniartitaanermut nakorsallu suliaannut tunngasuni tamatigoortumik ilisimasaqarnissaa qulaakkerumallugu pisinnaavoq.

*Imm.2.* Naalakkersuisut ilaasorta, matumani aamma Siulittaasoq piffissap, pineqartup toqqaagaaffigisaata sinnerani ilaasortaajunnaarsissinnaavaat, taassuma sivisuumik napparsimanini allatulluunniit pisinnaannginnini, imaluunniit naleqqutinniginnini pissutigalugu maalaaruteqartarfimmi ilaasortatut sulisinnaannginnera paasineqarpat.

*Imm.3.* Naalakkersuisut ilaasorta, matumani aamma Siulittaasoq ilaasortaajunnaarsissinnaavaat:

- 1) ilasorta, suliffeqarnermut, isumaginninnermut, ilinniartitaanermut peqqissutsimullu tunngasut pillugit inatsisit naapertorlugit pisussaaffimminik sumiginnaasimanini pissutigalugu soraarsitaappat imaluunniit akuersissumminik arsaagaappat, imaluunniit
- 2) ilaasorta, suliasami Napparsimasut Maalaarutaannik Aalajangiisartunit aalajangiiffigineqartumi isornartorsiorneqarpat.

## **Kapitali 5**

### *Aalajangersakkat assigiinnigitsut*

**§ 21.** Siusinaartumik pensionisiaqarnermut maalaaruteqartarfimmi ilaasortat Inatsisartunut Naalakkersuisunullu ilaasortat il.il. aningaasarsiaqartitaanerat il.il. pillugit Inatsisartut inatsisaanni § 18, imm. 1-imi 2-milu maleruagassat naapertorlugit aningaasarsiaqartinneqassapput il.il.

*Atortuulerfia*

§ 22. Nalunaarut ulloq 1. novemberi 2016-imi atortuulissaaq.

*Namminersorlutik Oqartussat, ulloq 28. oktober 2016*

Sara Olsvig

/

Julie Præst Wilche